



Broj: 01/24-02-679-3/24
Sarajevo, 22.03.2024.godine

Z A P I S N I K

s 11. sjednice Odbora za poljoprivredu, vodoprivredu i šumarstvo Predstavničkog doma Parlamenta Federacije BiH, održane 22.03.2024. godine.

Sjednica je počela s radom u 10:00 sati.

Sjednicom je predsjedao Sandi Salkić, predsjednik Odbora.

Prisutni na sjednici: Sandi Salkić, predsjednik Odbora, Bajro Makić, Edin Mušić, Nijaz Helez, Senad Subašić, Stanko Musa, Zekerijah Alagić, Damir Nikšić, Haris Silajdžić.

Odsustvo su opravdali: Indira Omeragić

Gosti na sjednici: Kemal Hrnjić, ministar; Damir Pavković, SSFBiH, Ermin Veladžić, UPPFBiH, Nedžad Bajrić, Dragan Pavković, SSFBiH, Bićo Nedžad, Elvis Halkić, David Mijatović.

Nakon što je pozdravio članove Odbora predsjednik Odbora Sandi Salkić konstatovao je da postoji kvorum za rad, a potom pročitao predloženi dnevni red 11. sjednice Odbora za poljoprivredu, vodoprivredu i šumarstvo Predstavničkog doma Parlamenta Federacije BiH.

DNEVNI RED

1. Usvajanje Zapisnika sa 10. sjednice Odbora;
2. Strategija poljoprivrede i ruralnog razvoja Federacije Bosne i Hercegovine 2021.-2027.
3. Nacrt programa novčanih podrški u poljoprivredi i ruralnom razvoju za 2024. godinu – javna rasprava;
4. Inicijativa za izvorno-autentično tumačenje koju je uputilo kantonalno tužilaštvo Bosansko-podrinjskog kantona-Goražde
5. Tekuća pitanja

Ad-1.

Zapisnik sa 10. sjednice Odbora je usvojen jednoglasno.

Ad-2.

Predsjednik Odbora dao je riječ Bajru Makiću, članu Odbora. Makić je izrazio nedoumicu u vezi sa definicijom zakona koji se odnosi na proizvodnju mlijeka, te je postavio pitanje da li poljoprivrednici imaju opciju da se odluče po litri ili po grlu. Kemal Hrnjić, federalni ministar poljoprivrede, vodoprivrede i šumarstva, informisao je prisutne da se trenutno radi na tehničkim detaljima oko izbora između dva ponuđena modela, uz napomenu da će biti moguće i opredjeljenje za zadržavanje postojećeg modela. Stanko Musa je naglasio da je Ministarstvo uvažilo sve prijedloge i primjedbe na strategiju poljoprivrede i ruralnog razvoja Federacije Bosne i Hercegovine za period od 2021. do 2027. godine tokom 10. sjednice, istakavši važnost brzog usvajanja strategije radi donošenja programa koji će omogućiti pravovremenu isplatu finansijske podrške. Dragan Pavković, predsjednik SSFBiH, je istakao zadovoljstvo dosadašnjim programom i podržao daljnje aktivnosti.

ZAKLJUČAK

Odbor za poljoprivredu, vodoprivredu i šumarstvo prihvata Strategiju poljoprivrede i ruralnog razvoja Federacije Bosne i Hercegovine 2021.-2027. Odbor predlaže Predstavničkom domu Parlamenta Federacije Bosne i Hercegovine da istu usvoji.

Zaključak je usvojen jednoglasno.

Ad-3.

Na sastanku Odbora, predsjednik je dao riječ Nijazu Helezu, članu Odbora, koji je ukazao na potrebu pažljivog razmatranja načina na koji se tretira med. Dragan Pavković, predsjednik SSFBiH, izrazio je stav da nije neophodno tražiti građevinsku dozvolu za izgradnju platenika, istovremeno pohvaljujući brze rokove isplate finansijskih sredstava. Bajro Makić, također član Odbora, predložio je promjenu naziva "grad-selo" u programu podrške mladima u poljoprivredi, navodeći da takav naziv može ograničiti mlade ljude sa sela da se pridruže projektu. Ministar je istakao važnost projekta novčane podrške mladima koji žele ući u poljoprivredu, te je prihvatio Makićevu sugestiju. Edin Mušić, također član Odbora, naglasio je potrebu povećanja novčane podrške za izvorne zaštićene pasmine životinja, posebno buše, brdske konje i tornjake. Ministar je naglasio da je cilj ovog programa usklađivanje sa standardima EU, uz poštovanje domaćih specifičnosti, te je dodao da Federacija BiH trenutno djeluje samo na području jednog entiteta zbog ograničenja saradnje sa entitetom RS. Ministar je također istakao novu mjeru kojom se podstiče upotreba stajskog gnojiva na poljoprivrednim parcelama, s ciljem poboljšanja kvaliteta zemljišta, uz naglasak na važnosti analize zemljišta. Ermin Veladžić je pohvalio kvalitet nacrtu sa veoma malim primjedbama, ističući da su već uputili svoje prijedloge. Sandi Salkić, predsjednik Odbora, predložio je pet sugestija i prijedloga koji će biti prosljeđeni nadležnom ministarstvu.

ZAKLJUČAK

Odbor za poljoprivredu, vodoprivredu i šumarstvo će uputiti resornom ministarstvu svoje prijedloge i sugestije na Program kao i sugestije poljoprivrednih udruženja.

Zaključak je usvojen jednoglasno.

Ad-4.

Odbor je jednoglasno zaključio da nije nadležan za predmetna pitanja.

Ad-5.

O ovoj tački dnevnoga reda Odbor nije raspravljao, pa su inicijative, prijedlozi i informacije koje bi eventualno bile upućene Odboru ostavljene za raspravu na sljedećoj sjednici Odbora.

Sjednica Odbora završila je s radom u 12:00 sati.

PREDSJEDNIK ODBORA

Sandi Salkić s.r.